



浦城縣志卷之四

東晉

賜進士第知浦城縣事建

纂脩

訓導樵川張希賢

校正

葛陽周象台

邑庠生吳懋諒

徐沛

周文斗編

李之蕃

道學

氏為之嚆矢

以斯文自任

將賢否

道允待人而傳乃探玄珠水何高詔離朱之多也
道學之倡於閩實紫陽氏為嚆矢西山先生起而承
之慨然以斯文之任繼往開來功居多矣然山宗崑崙
未免岑卓之非山也水宗河海未必川瀆之非水也則
涉津問蹠欣附門牆心均有取焉夫儒以經術發家經
術而不本於道德安用經術為爰是以諸儒為之指南
宋

真德秀字景元後更希元自號西山先生生而穎悟讀
書過目輒成誦稍長即能文十八舉于鄉慶元五年
登進士授南劍軍判官開熙元年復中博學宏詞科

二年除太學正嘉定元年遷博士上疏言自韓侂胄
專政以偽學斥忠良今宜褒崇名節明示好尚是月
召試學士院除秘書省正字充

御試編排官兼王謀所檢討二年除校書郎論王謀會要
迎合柄臣乞加辨正充浙王府教授兼學士院權直
三年夏授秘書郎四年春除著作佐郎秋兼禮部郎
官五年夏除軍器少監陞權直學士院六年春擢起
居舍人以虜寇主充金國賀即位至盱眙而復凡山
川險易士卒勇怯及守將否邊民疾苦咸識于冊
七年三月金人來求歲幣為典宜與

上從之八年春領江東計度轉運副使值歲蝗旱荒政具
舉所活甚衆九年冬除右一府脩撰知泉州蒞郡二
年愛民善俗民至今思之十一年以平海寇功轉朝
散大夫十二年除集英殿脩撰知隆興府安撫江西
十三年丁內憂築西山精舍講學服闋除寶謨閣待
制知潭州湖南安撫使兼宮教諫皇子濟國公竑曰
皇子若能孝於慈母而敬大臣則天下歸之矣否則
深可慮也竑不聽遂力請外十七年兼權轉運副使
勉勵僚屬諭俗勸學湘中翕然嚮化潭人為立生祠
自知潭州召還入對勸

帝容受直言召用賢臣固結人心

帝嘉納之除禮部侍郎兼直學士院

理宗踐位寶慶元年起居即魏了翁金部員外郎洪咨夔
相繼言竑之寃及先生入對因謂嘗川之變非濟即
本志前有避匿之迹後聞捕討之謀情狀本末灼然
可考願詔有司討論雍熙追封秦卽舍罪恤孤故事
斟酌行之

帝曰善其二言乞收人心其三言

朝廷之上敏銳之士多於老成政事之才富於經術經筵
進讀殫忠啟沃以副

而言者詆之

主上

虛懷求助之意而言者

以之落埃章閣待制既歸浦

城讀伊洛諸書乃修讀書

記語門人曰此人君為治

之門如有用我者執此而往可也紹定四年以恩復

寶謨閣待制提舉王隆萬壽宮五年集文章正宗秋

除徽猷閣待制知福州福建安撫端平元年召為翰

林學士乃以所撰大學衍義四十三卷并目錄共成

二十三帙隨表上進次日即於後殿聚講焉先生學

以考亭為宗以毋自欺為本以至誠為極致立朝不

滿十年奏疏將數十萬言皆切當世要務四方文士

誦其文想其風采及宦遊所至惠政深洽不愧其言

由是中外交頌都城人時驚傳奔擁出關曰真直院

至矣果至則又填塞聚觀不置史彌遠以是擯斥之

而聲聞愈章及歸朝將大用則時已得疾遂三上表

乞祠乃不得已授資政殿學士提舉萬壽宮兼侍讀

逾旬而卒年五十有八遺表聞

上震悼輒朝贈銀青光祿大夫謚文忠嘉熙三年配朱文

公祠正統三年戊午春

詔從祀夫子廟庭成化三年夏兵部左侍郎兼翰林學士

商輅具奏乞定議封爵奏

青追封浦城伯通行南北二山并天下學校改正從祀牌

位且建特祠歲時有司以學博欽崇焉先生所著書不一難以枚舉其有功於道統者則大學衍義全書云

儒林

章望之字表民以伯父得象蔭除秘書省校書郎監杭州茶庫踰年辭疾去上書論時政凡萬餘言不報兄拱之知晉江縣忤其守得罪望之訴於朝拱之竟得免歐陽脩韓絳吳奎劉敞范鎮同薦其才除簽書建康軍節度判官又除知烏程縣俱不赴遂以光祿寺丞致仕卒望之言議論宗孟軻言性善排斥荀卿楊

韓愈李翱之說著救性七篇歐陽脩論魏梁為正

統望之以為非著明統三篇李觀謂仁義智信樂政

刑皆出於禮望之著禮論一篇以訂其說又有歌詩

雜文數百篇集為三十卷

詳見宋史本傳

續繪字質夫少同楊時遊程頤之門甚器之登大觀三

年進士浮沉州縣不以軒冕為榮而以名教為樂官

至奉議郎

楊昭述字宗魯賦性醇雅而長於議論遠近之人爭遣

子弟師之陳襄主浦城簿年以殊禮嘉祐特奏名出

身授池州石埭尉始至而教之邑人於是

浦城特以殊

選秀民進而教

相率趨學呼為楊夫子任滿調雷州海康縣令踰年以疾卒

郭頴舊作緒字天錫將生之夕母夢天上有金書數十字既覺止記一頴字已而頴生因以名之自幼讀書如素習弱冠鄉舉第二人晚得官調上杭簿留意邵康節象數之學兼取楊子雲所擬列山氏易以章會統元推之爻而成書名易春秋按畝布卦計二萬八千言釐為二十卷總之以畝隆興紀元以其書上會得疾卒

劉翔字圖南通諸經尤注意於易以累舉得官調新

尉因上其所著易卦辭有旨看詳監學以通經旨授福州教授翔謂教官實風化所係要當上不負天子次不負州郡下不負子弟入學之意在官四年軒輊抑揚盡合公論再潭州多士歸心以疾卒于官年六十九所著有經進易解十卷翰林洪邁為之序云君子之疏或探至理於先儒未悟而議論不詭或迹人事於前世已行而考據明白人固喜讀之况又遭值天子延其光榮必傳於世無疑矣

潘殖

府舊志作殖新作植

字子醇自號浩然子大觀中兩以鄉薦

上禮部夢童子以詩一聯示之云一分南北東西國

一聯示之云才分南

為報三秋桂子香建炎八年申車駕在維揚累舉得官
夢中之詩盡驗累調真州推官初好王氏之學後悟
其非迺以克己為學至忘寢食久之有得於是述忘
筌書三卷理性書九篇劉勉之胡憲劉子翬皆喜其
書子翬跋其後極稱其得學易門戶於易之復殖又
嘗畫觀象玄契二圖大抵以背境回光為主與忘筌
書理性書並行於世

徐宗慶善議論通經史嘗著皇王大訓書曰古今帝王
之道與其為治之具盡在是矣又有經世明道集曰
賢聖之道載之言觀其言足以知其所用心辟教官

以疾卒

練達字彥然登進士第授撫州司戶任劍浦令改本州
軍事推官部使者交薦之改秩而卒楊時銘其墓云
孝尊于親學傳千人政得千民吁嗟乎君未聞而終
千蕃賓百世之下有煥斯文

卷之四終

浦城縣志卷之五

文章

攷有宋迄今以作鳴者可縷指也宋則廬陵眉山明則
信陽北地彼用創為功故于詞林特著耳顧文章隨時
代各有至嗣是而擷芳採藻自成一家者寧溟滓弟之
哉則樞浦諸君子其人也試窺其所著述者田百世之
藪而漁獵之業徵不朽然世運綿遠菁華歇絕爰是並
列文苑俾操觚者知景行焉

宋

楊徽之字仲猷少好學純厚清介其文蔚齊名擢顯

知全州

德二年進士開寶初為著作佐郎知全州太宗踐祚拜左拾遺遷右補闕太宗顧左右曰朕在藩邸日聞其能詩因索所著徽之以數百篇奏御且獻詩稱謝其卒章曰十年流落今何幸叨遇君王問姓名太宗深喜和而賜之未幾遷侍御史預編文苑英華一千卷尤精風雅特命編詩為百八十卷書成遷兵部郎中端拱初拜左諫議大夫為張洎劉昌言所誣出知許州入判史館事因對太宗顧輔臣曰徽之儒雅之士操履無玷寘於館殿得其宜矣真宗即位拜工部侍郎樞密直學士兼翰林侍讀學士侍讀學士之

置自徽之始景德二年車駕幸澶淵明年春還都時徽之已屬疾自草表迎駕云瑀戈既遠玉輅初迴春色正滿於皇州紫氣長隨於華蓋卒年八十贈兵部尚書景祐二年詔以徽之先帝宮僚贈太子少師謚文莊有古律詩十五卷傳于世從祀鄉賢

楊億字大年祖文逸南唐玉山令嘗夢一羽衣自稱懷玉山人來謁已而生億有毛被體盈尺踰月始墮方能言母口授以小經隨即記誦六歲能詩七歲善屬文雍熙初詔江南轉運使李去華以所試文同送赴闕引對試詩賦三篇援筆立就年二十有一馬太宗

賞異令內侍送中書表授秘書正字特製袍笏賜之
上賞花後苑億為光祿寺丞召命賦詩輔臣稱其警
敏明年宴苑中怪億不在左右有司對非貼職不與
立命除直集賢院表求歸里中迎母太宗知其貧賜
錢十五萬真宗朝荐歷親近擢知制誥為翰林學士
同王欽若脩冊府元龜又脩太宗實錄八十卷而億
手草五十六卷為執政所忌母病謂告不待旨逕歸
韓城與弟倚居踰年不調有啓謝朝中親知云介推
母子願歸綿上之田伯夷兄弟甘受首陽之餓後除
知汝州天禧二年拜工部侍郎又兼史館脩撰判館

事祥符間朝廷制度議論皆取裁於億五年十二月
上欲立德妃為皇后翰林院學士李迪言妃起於寒
微不可以母天下帝不從欲得億草詔使丁謂諭旨
謂曰勉為此不憂富貴億曰如此富貴不願得也乃
命它學士馬卒年四十七景祐四年樞密使王梅叔
上其詔草仁宗令議追贈有司言故事非曾任二府
及事東宮法不應贈上曰億為國竭忠有君子大節
可以常典拘乎贈禮部尚書謚曰文門人鄭戩集其
文一百九十四卷歸蓬山集從祀鄉賢

黃覺字民先景德二年進士仁殿中丞有詩名楊億劉

子儀章得象宋祁皆與之唱和。仁宦不遂意一日送客都門外至則客已去見一道士在側呼與同飲既罷道士掬水寫呂字始悟其為呂洞賓道士曰明年江南相見果得官江南及期見道士出大錢七文次十文又小錢三文與之曰數不可益也又予藥數寸曰歲旦以酒磨服可保一世無疾覺如其言年七十餘藥垂盡作詩曰床頭曆日無多字屈指明年七十三果以是歲終子孝緯

黃鑑字唐卿大中祥符八年舉進士調桂陽監判官除國子監直講遷國史院編修官修國史成擢直集賢院以母老出倅蘇州脩三朝寶訓書未及上而卒仁宗特官其一子以旌其勞有談苑十五卷

章岷字伯鎮天聖五年舉進士嘗與范仲淹同賦鬪茶歌岷詩先就仲淹覽曰此詩真可壓倒元白官至正議大夫光祿卿弟峴岵嶰俱登第岷廣西提刑

黃元字清臣母夢星殞于懷掬而吞之遂有娠生元少奇穎年十五以文謁章得象得象奇之遊錢塘以詩贈處士林逋尤激賞時王隨知杭州奏禁西湖為放生池元作詩數百言以頌士人爭傳之元為人侏儒不飾小節對人野率如不自言然嗜學強記文詞奇

滄城縣志 卷之五
偉既卒鄉人類其文為十一卷號東溪集

楊翊字正臣善聲律有晉宋風度登天聖八年進士授
南安尉偶得微疾投檄去未幾疾愈或勉之仕弗顧
以詩酒自娛同年蔡襄招以詩又率同列薦之不起
嘗遊武夷每至勝處必有題詠既歸有道士來謁刺
字稱張湛然翊令子弟館之南園中夜月明如晝道
士長嘯池上須臾雲氣慘淡清飈四起雙鶴嘹唳道
士遂失所在明日諸子弟以告公始悟十三真君中
所謂張湛白馬者也取刺紙視之迺白紙耳

練定字公權嘉祐八年擢進士第初調和州烏江尉再

除福州司理紹聖初呂惠卿知大名奏掌機宜文字
召對論事以尊主疆國為先不合時宰意通判信州
久之召為將作監丞除湖南轉運判官崇寧間提點
本路刑獄移廣南路諸子不欲其踰嶺表勸以乞祠
定正色曰臣事君猶子事父也父召無諾君命召不
俟駕詎可擇地為去就哉即日就道官至朝請大夫
有青丘集二十卷行於世

徐常字彥和融之子元豐中登第別歷州縣所至有聲
紹聖間除廣南西路提舉常平移福州轉運判官繼
知吉州姦民猾吏畏如神明與蘇軾兄弟遊從甚久

又每慕二宋為人嘗作詩云事業要須師二宋文章
端是學三蘇而軾亦謂彥和天下奇男子官至朝議
大夫弟當亦登進士第

姚易字夢錫元豐八年擢進士第兩任教官改秩崇寧
初有薦易者召對除諸王宮教授上出所愛畫繪賜
之逾年授開封府推官滿考除通判易與同邑葉常
何去非相締厚平時酬唱甚多所著有畢集十卷

何去非字正通學問該博有識度累舉進士不第元豐
五年神祖臨軒策士曾鞏奏得累舉之士一人所對
論用兵之要非通儒碩學不能天子覽而異之後數

日上御集英殿賜第迺得去非名引即殿陛問曰昔
嘗遊邊乎對曰臣生長閩粵每恨未識邊防制度又
問何以知兵對曰臣聞文武一道古之儒者未嘗不
知兵上喜顧大臣優與之官或奏宜授武職使效所
言因擬左班殿直遷左侍禁中武學教諭使校兵法
七書書奏復見褒賞尋擢博士元祐四年蘇軾得其
所為文驚曰此班馬也力薦於朝且謂去非文章議
論實有過人筆勢雄健得楚漢風力乞換文資別加
擢用詔加承奉郎博士如故歲餘出為徐州教授蘇
軾又以去非所著備論乞除一館職不報秩滿知富

浦城縣志 卷之五 六
陽縣發姦摘伏政覩神明築石堤以捍錢塘江潮往來便之部使者奏最改通直郎通判滄州綏撫流移民賴以安除司農寺丞懇求補外改廬州通判卒年七十三有文集二十卷備論四卷司馬法講義三卷三畧講義三卷從祀鄉賢

吳駿字瞻遠韶甌知名登元豐八年進士調潞州上黨簿薦知虔化縣通判永州以謗謫池陽政和初中丞吳執中抗章為辯其枉通判饒州未幾告老祖秀實以詩寄駿云官路聲名二十年江鄉舊仰貳車賢推將事業歸塵外收得工夫到酒邊解榻幾聞招隱士

炷香終日對帝編公朝况是登耆哲早脫蒲輪穩著鞭卒年七十四所著有詩解二十卷文集十卷雄深雅健淵源浩博粹然備衆體之長

黃蕡字仲實震曾孫也父嘗與客飲命蕡為詩伯父戲之曰汝叔祖諱鑑者年七歲賦菟子詩為世傳誦汝能之乎蕡曰彼亦吾族耳若天人則固不敢望言畢詩就有黃梅姑且饒他詠丹桂行須見我攀之句滿座稱賞嘗作易傳推明太衍之數尤精確元祐五年蕡年二十有八時周史卿得僊術煉丹於油果山蕡與外舅楊亞夫同謁先生祈雨先生出神伏章達旦

始寤賁恠其久先生曰昨到天門值揭來春進士榜
道途壅遏不得即入所以久及詢與榜姓名先生初
不敢泄力詰之廼密言賁名在前列次年賁果擢進
士第調黃岡簿改贛縣尉在官尚氣節不能俯仰會
飛蝗入境多方捕之有惡賁者反以捕蝗不及罷太
恬不介意元符初起為宣城丞窮職分而為之授和
州錄事參軍改宣教即知奉新縣人以為賀賁曰為
五斗折腰豈吾志我不赴而卒年五十一

葉常字權之紹聖四年擢進士甲科授太學正遷博士
大觀初除太常博士遷工部員外累丐補外出知河

中府卒于官年四十六官至朝奉大夫嘗與同里侍
郎黃應圖交厚後以職事相失經年因作燕燕詞以
遺之云燕燕出幽谷短羽方差池營巢依廣廈辛苦
將芹泥崇朝濕丹領一點污羅衣重幕護綺繡方簾
放珠璣平時頡頏地咫尺天一涯雨露不上天水覆
收之誰王謝堂前物肯作尋常飛吾才愧相如願賦
長門詞應圖得詩甚喜相好如初有文集五十卷

周固字適可崇寧四年釋褐第一調蕭山尉禮部尚書
黃裳薦之改舒州教授秩滿調漳州移江東提舉司
管勾文字有旨令兩制各舉所知三人尚書曾孝廣

以固應詔丞相何執中當國奏宜處師儒之任除太
學正遷博士除京畿提學詔拜監察御史擢壁雍司
業累章乞外直稅閣知沂州未任而卒固官上庠八
年經題品者皆為名賢龍圖祖秀實亦門下士有壁
水集十五卷

楊喚字元輝天資英邁年甫弱冠為文有老成氣年二
十預薦再舉國學崇宣五年擢進士第調濠州鍾離
主簿表進中臺甘露頌陞從政郎授郴州司錄改宣
教郎還朝表進所業二十卷天子奇其才擢知大寧
監遷奉議郎以磨勘轉朝奉郎上殿稱旨除主管官

宣和五年新制明堂除明堂頒朔布政府司令轉朝
奉大夫出知蘄州陞朝散大夫被召未赴卒年四十
四有文集三十卷宦遊集十卷筆力雄健而文彩燁
然

張亨字正仲幼警悟季父嘗戲之曰聞汝讀孝經有何
好處對曰立身揚名以顯父母季父大奇之登大觀
三年進士調建昌主簿改南昌弋陽二邑丞靖康中
翁彥國自錢塘舉師勤王辟參贊軍事聞彥國與趙
子崧等會盟于宿毫登壇爭軟亨以書苦諫曰淵聖
駐危城中宗社若綴旒日望四方勤王之師臣子當

百舍一息豈爭盟競長之時漢末曹袁故轍豈可復
蹈耶彥國弗能用遂不往後子崧等皆以罪罷紹興
初知海陽縣時當軍興賦歛百出身與民約死無追
擾軍需亦如期而集曾孝蘊師湖南辟知武岡軍命
未下卒身工駢儷之文孫覲嘗薦於當路不獲用身
謝啓云魯箭高飛謂聊城之死下秦都不割懷趙壁
以空歸有雙溪漫叟集二十卷松窓撫遺十二卷

徐鳳字子儀四歲知讀書七歲能屬文十四五閱古今
書畧徧十九舉鄉薦登慶元二年進士除漳浦主簿
嘉定十二年召對給筆札于玉堂之廬時山東諸

新立功未見跋扈狀鳳言蓄毒所以攻疾而施之常
服則元氣必傷虎不縱之山林而豢之家庭又將噬
人矣今忠義之徒官供家請誠不可已盍亦鼓舞歆
動之俾常以逐北為利而不復懷巢南之安則責望
於我者輕矣否則亟行賈誼衆建諸侯之策為置部
落而少其力力少則易使以義黨與散則無和心疊
疊幾萬言切中時病識者知其有識治才非專雕鏤
組織為文人而已歷事寧宗理宗出入翰苑屢進嘉
猷嘗著十箴一卷內制十卷文集二十卷官至秘書
少監直學士院卒年四十八真文忠公為誌其墓後

以子爵贈金紫光祿大夫翰林大學士

元

楊載字仲弘後徙杭州少孤博涉群書年四十以薦為國史院編脩遷宣國路推官載為文以氣為主自成一家言而於詩尤有法嘗為學詩者當取材於楚漢而音節以唐人為宗不然吾見其能詩者鮮矣與虞集揭傒斯范德棧齊名世稱虞楊范揭從祀鄉賢

國朝

黃福字汝錫領洪武三十二年鄉薦博通經史任杭州府學訓導陞太常博士永樂中預脩五經四書大全

及性理大全書陞本寺寺丞

蕭福字九疇學問該博舉進士任翰林院庶吉士陞吏部考工司員外郎

吳中立字公度隆慶辛未進士疏乞歸養父歿服闋就選乃喟然曰古人為親而祿故南遊致嘆北向興悲信有以也吾今祿不逮親矣何戀戀于此哉遂絕意仕進以著述為事結廬武夷山中太史張元忭公結廬入山為十日談微諷以仕則曰朝廷之上子為政山林之下我為政他日天祿黃閣功屬諸子洞天少室名屬諸我士各有志矣張嘆息而去宗伯袁公洪

愈都諫周公邦傑侍御楊公四知冢宰楊公魏俱上
其清脩乞加榮寵

欽授禮部儀制司主事煥病痊錄用萬曆己丑卒于家至
壬辰推陞尚寶司丞報至已逝矣所著有易詮古本
學庸大旨道德經註員覺經註河上遺言竒鏡竒藏
星抄諸書

浦城縣志卷之五

名臣

士人顯晦之途不一顧不患官負其人而患人負其官
倘傳舍而遽廬之詩人所以刺伐檀也粵稽浦邑諸大
夫何彬然稱盛也其服在列鄉股肱王室者依日月之
光以昭明來禩凡百庶司厥有成聞亦庶幾乎濟濟多
士之風焉上下數百年來後先赫奕尚論其世夫亦當
代得失之林也

宋

楊字晏如建隆二年進士爲文敏捷實儀謂其可當

檄之任授青州司戶參軍召試改著作佐郎江南
平改虔州通判令就曹彬分兵以行其境廼單騎造
偽帥郭再興營諭以國威再興即納符印激悉料城
中壯勇部送京師士豪黎羅二姓謀亂率兵擒之械
送闕下遷右贊善大夫知淄州咸平初選為雍王府
記室加金紫終祠部郎中卒年七十四

黃震字伯起登端拱二年進士累遷著作佐郎通判遂
州嘗有詔給西川軍士緡錢東川軍士以賜不及已
謀為變震自主者曰朝廷豈忘東川和殆詔書稽留
爾不如依西川例與之守持不可徑入州帑分給衆

乃定明日詔果至累遷尚書都官員外郎提點湖北
路刑獄判三司磨勘司擢江淮發運使先是李溥自
三司小吏為發運使十餘年姦賊狼藉丁謂黨之無
敢言者震將行上書自陳辭頗憤激真宗知其意在
溥也諭之曰卿當與人和震對曰廉正公忠臣職也
負陛下任使者臣不敢與和既至發溥姦賊數十事
溥坐廢而震亦為溥訟奪一官及謂貶復知饒州徙
廣東轉運使廣南歲進異花數千本至都下道踞煩
擾震奏罷之卒年六十四

詳見宋史從祀鄉賢

黃字昇之咸平二年登第除許昌幕官知德化縣後

錢塘引薦除大理評事知光州代還遷秘書丞知
秦州黎與南詔接境鎮以清靜疾卒黎人思旦之德
相與立廟歲時祀之子鑄孫敏順曾孫敷書敦彥俱
列顯官

吳待問字子禮與楊億同州里每造億億厚禮之門下
少年多易之億曰彼他日所享非若曹可望也咸平
三年登進士第除萬壽縣尉楊文公自括蒼至贈待
問詩云宦途南北最情親歲晏相逢潁水濱舊日青
衫同學校暫時黃綬困埃塵樽中滿泛香醪美門外
高懸綵棒新鷄黍殷勤情未足主人留客雨留人遷

大理寺丞稍歷要職仁宗朝累官禮部侍郎致仕
曆五年以列卿奉朝請時人榮之其子育拜參知政
事次年以給事中知許州迎侍之官卒於永興軍年
七十二累贈太師秦國公

章得象字希言仔鈞玄孫母初服夢庭橫象笏因以得
象名之及長姿表莊重聲響如鍾咸平五年進士及
第授大理評事知玉山縣遷大理寺丞歷知台州南
雄州徙洪州楊億薦其有公輔器或聞之億曰閩士
輕狹而得象深厚有容此其貴也召直史館仁宗朝
遷翰林學士時太后臨朝宦官方熾后每遣內侍至

與士院得象况正色待之或不交一言寶元初拜同
中書門下平章事集賢殿大學士仁宗謂之曰向太
后臨朝群臣邪正朕皆默識之卿清忠無所附且未
嘗有所干請今日用卿職此故也陝西用兵加中書
侍郎兼工部尚書樞密使慶曆五年拜鎮安軍節度
使同平章事封卽國公判河南府守司空致仕薨帝
親臨奠贈太尉兼侍中謚文憲皇祐中改謚文簡得
象在中書凡八年宗黨親戚一切抑而不進時稱簡
重之相詳見宋史本傳

童頤字簡之咸平三年與弟頤同舉進士有詔兄弟毋

並舉頤即推與弟登景德二年進士授校書郎知南
昌縣遷殿中丞天禧初擢監察御史命安撫西京還
爲三司度支判官調鞫邛州牙校訟益井事后戚皇
城使劉美受賂頤捕繫忤旨出知宣州遷侍御史左
遷北部員外郎監饒州酒稅起知信州徙潭州遷廣
西轉運使入爲刑部郎中假右諫議大夫使契丹至
紫濛館卒

楊偉字子奇億弟天禧元年獻頌召試學士院賜進士
及第以校書郎知龍游縣累遷集賢校理通判單州
日巡部卒李素合州卒謀殺巡檢使入鼓角門州將

不敢出偉挺身往問曰若屬何爲而反衆曰將有訐
於州非反也偉曰持兵而來非反而何若屬俱有父
母妻子以一朝之忿而欲魚肉之乎悉令投兵坐籍
首惡得十餘人斬之遷兵部員外郎同脩起居注命
知制誥權諫院嘗曰諫臣宜陳列大事細故何足論
皇祐中拜翰林學士祀明堂判太常寺為群牧使兼
侍讀學士進中書舍人卒贈禮部侍郎詳見宋史本傳
黃孝先字子思嗜學能文舅楊億尤愛之天聖二年擢
進士第調廣濟尉改宿州司理盜有行劫死於路者
其子李婆兒疑其黨殺之欲告其事黨人誘婆兒同

劫得財倍與之婆兒不復言盜且敗孝先曰婆兒屢
甚烏能劫白守直其獄不聽孝先爭益力守怒斥之
孝先曰獄官可殺獄事不可移也未幾新太守董儲
至孝先曰婆兒活矣儲卒如孝先議在符離離多所平
反活死罪十有六人部使者吳遵路與太守董儲合
薦其能治獄遷大理丞知咸陽縣回鶻來朝過其邑
有死者藁葬道左孝先曰異俗鄉化不幸又使暴露
豈朝廷懷遠意哉封冢表識之後回鶻使人過其側
無不流涕感孝先之仁移知漢州綿竹改殿中丞元
昊叛西邊用兵詔蜀中稅緡錢孝先曰歲饒行此則

民益病上其不便朝廷從之知孟之濟源改太常博
士通判石州終于官累贈大中大夫職方郎中所著
詩文二十卷東坡為之序子好謙好信皆登仕

吳育字春卿待問之子天聖五年試禮部第一以大理
評事知臨安諸暨二縣又知襄城縣自秦悼王葬於
汝宦官宗室往來不勝騷擾育請具成數毋容苛索
由是民省供費之半入境者輒相戒毋縱暴焉舉賢
良方正擢著作郎直集賢院知太常禮院奏定太常
新禮慶曆祀儀元昊僭號議用兵育數言宜援國初
江南故事稍易其名順拊而收之議者以為姑息厥

後師出無功始悔不用其言除同脩起居注知制誥
進翰林學士知開封府鋤治豪猾輦下肅然慶曆五
年遷諫議大夫樞密副使尋拜叅知政事山東盜起
遣中使按視還奏盜不足慮兗州杜衍鄆州富弼得
人心可憂帝欲徙二人于淮南育曰盜誠不足慮人
乘撓以傾大臣禍不可長矣事遂寢章獻章懿升祔
議者請覃恩且優賜軍士育曰無事而啓僥倖誰建
此議者請治之已而外人皆怨執政帝以語輔臣育
曰臣以身許國何憚此耶向綬知永靜軍為不法返
以危法中通判江中立使自經大臣以宰相予庇之

育曰不殺綬無以示天下卒流南方育在政府遇事
敢言與宰相賈昌期爭事上前左右皆失色育論辯
不已因請曰臣所爭者職也顧力不勝願罷臣職乃
復以為樞密副使未幾出知許州遷禮部侍郎知永
興軍召兼翰林侍讀學士進資政殿大學士判尚書
都省除宣徽南院使帥御筵以疾辭邊任復以為資
政殿大學士尚書左丞知河中府徙河南府卒年五
十五贈吏部尚書謚正肅

詳見宋史本傳及言行別錄

吳充字冲卿待問季子未冠登景祐五年進士調穀熟
主簿入為國子監直講兼吳王宮教授等輩多與宗

王狎充獨以嚴見憚作六箴以獻仁宗命繕寫賜皇
族在藩者歐陽脩以救胡宿之子補外充乞同貶脩
得復留除知太常禮院英宗立數問充所在會入觀
語其為宮教時事嘉勞之權鹽鐵副使熙寧元年知
制誥神宗諭之曰先帝知卿久矣遂同知諫院言士
大夫親歿莫葬之失宜限期使葬詔著為令子安持
王安石婿也引嫌解諫職知審刑院權三司使為翰
林學士拜樞密副使進檢校太傅樞密使數為帝言
新法不便帝察其中立無與欲相之安石去遂代為
同中書門下平章事監脩國史首乞召還司馬光呂

公著韓維蘓頌及薦孫覺李常寧程顥等數十人王
珪與充並相忌充陰掣其肘而蔡確張璪累加詆毀
以疾罷為觀文殿大學士西太一宮使踰月卒年六
十贈司空兼侍中謚正憲充內行脩飭事凡甚謹為
相務安靜世謂其心正而力不逮將終戒妻子勿以
私事干朝廷

詳見宋史本傳從祀鄉賢

張詵字樞言登寶元元年進士累遷著作佐郎通判越
州神宗朝擢夔路轉運判官以建拓瀘夷地加直集
賢院改陝西轉運副使召對帝曰朕未識卿每閱章
奏獨卿與蔡挺有所論請使人了然尋當以帥事相

屬及入辭賜服金紫明年改直龍圖閣知秦州前此
將吏貪邊功多從羗地獵射因起邊釁詵至申令毋
得犯偶獲犯者一人斬諸境上群羗感悅遷天章閣
待制知熙州常破董氈斬首萬級元豐初加龍圖閣
直學士知城都府徙杭州將行復命權經畧熙河事
會靈武罷師過闕帝訪以西事對曰彼勢雖弱而我
師未銳邊備未飭願以歲月圖功哲宗立以正議大
夫奉祠卒年七十二

章衡字子平父訢潤州長史衡擢嘉祐二年進士第一
通判湖州直集賢院改鹽鐵判官同脩起居注上言

三司經費之弊三司使忌之出知汝州潁州熙寧初
還判太常寺時方議祧廟之制衡請尊禧祖為始祖
而次祧順祖以合子為父屈之義推禧祖侑感生之
祀而罷宣祖配位以合祖以孫尊之義復言自唐開
元纂禮書以國恤一章為豫凶事刪而去之故不幸
遇事則茫無所据宜為厚陵集禮以貽來世從之出
知鄭州奏罷原武監牧地四千二百頃歸之民復判
太常知審官西院使遼燕射連發破的遼待之加禮
嘗纂編年通載上之神宗謂可冠冕諸史面賜三品
服未幾進銀臺司直舍人院累加集賢院學士復以

待制累更州任卒年七十五

詳見宋史本傳從祀鄉賢

黃好謙字幾道孝先子幼孤事母孝擢嘉祐二年進士
第調單州司理改新蔡令歲艱食嬰兒多棄道上好
謙勸誘賑恤且下令小兒給壯者之半全活甚衆遷
著作佐郎熙寧初召對除中書編脩條例官舉為監
察御史裏行論知開封府當受部民訴常平事且直
賈蕃被誣之獄又謂宦官同管當三班院非祖宗故
事識者躋之求補外通判潁州舊相韓億留守北門
丐以自助遂通判大名朝廷益知好謙材除河北轉
運判官本路提典刑獄明年召對神宗面諭知卿毋

老子弟皆官京師故特召卿好謙頓首謝後知蔡州
哲宗祭極召爲駕部郎中以疾謝事不允知濮州改
潁州未赴而卒年六十六孝先令咸陽日主簿死無
以殮孝先適出他縣好謙時十五即謁雍守杜衍白
其事衍荅以當與僚佐議好謙曰公爲近侍典方面
屬吏死無以殮欲誰議耶衍即贖之一府稱爲奇童
王樂道孤峻寡合常言每見黃幾道使人氣和體舒
其叔度之遺風乎

章棻字質夫頻之孫登治平二年進士知陳留縣歷提
舉陝西常平成都路轉運使入爲右司員外郎元祐

初知慶州時朝廷戢兵且捐葭蘆等四砦予夏夏得
砦益驕棻言宜稍取其土疆如古削地之制然後諸
砦出兵擇據要害不一再舉彼勢將自蹙矣遂乘便
出討夏果入圍環州棻先謀知遣驍將折可適伏兵
洪德城邀擊之斬獲甚衆召權戶部侍郎明年知同
州紹聖初知廣州徙江淮發運使哲宗訪以邊事奏
對稱旨命知渭州築二城于石門峽江口好水河之
陰賜名平夏城靈平砦銳而廊延諸路皆相繼築城
夏人睜視不敢動會夏王將兵圍平夏建高車臨城
填塹而進不能克遯去棻謀知其弛倘夜襲直入其

帳執其統軍監軍虜馘三千餘夏主震駭哲宗朝連擢樞密直學士端明殿學士進階大中大夫案在涇原凡創州一城砦九自平夏之捷夏人屢請命乞和其邊功為西方最徽宗立請老徙知河南府入見留拜同知州樞密院事以其子緝為開府推官以便養踰年力請謝事授資政殿學士中太一宮使卒贈右銀青光祿大夫謚莊簡子緝綜綜綰緝緝緝孫菱蓋俱列顯仕

詳見宋史本傳

黃轍字遵晦四歲能誦書日記數千言治平四年擢進士乙科調虔州司理秩滿得衡之安仁令轍率民墾

田疇治溝洫進子弟之秀者于學時蒲宗孟察訪荆湖南北路辟為本司幹官且薦其材遷著作佐郎知新昌縣發奸摘伏而撫摩善良人不忍欺部使者奏其課為第一改奉議郎監泗州排岸丁母憂服闋拜大理丞乞補外通判筠州自筠還朝而卒年四十四官至朝奉郎

葉安節字亨之治平四年進士調樂平尉主明州鄞縣簿縣有海晏太丘靈巖三鄉介山谷間王安石嘗鑿巖起斗門于海濱未就而安節踵而成之三鄉蒙其利遂至富饒改宣德郎諸暨宰發奸摘伏政號神

明遷承議郎通判岢嵐管當陝西運司公事丁外艱
服滿除韓冀三宮大小學教授進朝散郎除太府寺
丞精意鈞考吏無所容其欺移知袁州卒官至朝散
大夫

章甫字端叔熙寧三年登第授山陰縣尹首竄姦吏數
人餘皆屏息莫敢欺監左藏庫通判宿州被旨按獄
南京片言折之人自以爲不寬除太府丞哲宗召對
除府界提舉常平事河溢歲饒流民多入畿甸因廩
給之而用其力增築河外堤堤成民不告勞知慶州
崇寧初黨論興首言元祐臣僚削籍投荒者皆緣國

事陛下稍令內徙道路稱慶今刻名著籍禁錮其子
孫臣竊惑焉上優容之然自是與時論不合宰相魯
布得罪甫坐降一官罷泰州崇寧五年卒累官至朝
奉大夫

黃寔字公是登熙寧六年進士歷司農主簿積官至京
東河北轉運副使哲宗欲召用爲魯布林希所沮乃
知陝州爲江淮發運副使賀遼主登位及境迓者移
牒來稱爲賀登寶位使寔報以受命無寶字拒不受
還除太僕卿再擢寶文閣待制知瀛州徙定州朝旨
籍民兵旁郡黃緣擾困寔停畝不下而畫利害請之

事得寢卒于宰贈龍圖閣直學士寔孝友敦睦世稱其內行蘓轍在陳與寔道因結_姻又與軾友善紹聖黨禍起寔以章惇甥故獲免然寔未嘗附惇亦不得久於朝焉

周常字仲脩登熙寧六年進士補太常博士以養親求教授揚州年未五十即致仕久之御史中丞黃履薦其恬退再起為太常博士辭元符初復申前命兼崇政殿說書遷著作佐郎疏言祖宗諸陵器物止用塗金服飾無珠玉蓋務在質素昭示訓戒自裕陵至宣仁后寢宮乃施金珠願收貯景靈殿以遵遺訓詔從

之置奉宸庫擢起居舍人鄒浩得罪常於講席論救貶監彬州酒稅徽宗立召為國子祭酒起居即從容言元祐法度互有得失人才各有短長不可偏棄時以天暑有旨記注官卯滿正即勿奏事仍著為令常言本朝記注多兼諫員故凡言動得以所聞見論可否神宗皇帝時脩注官雖不兼諫職亦許以史事直前陳述陛下以炎歊可畏暫停進對亦人情之常若著為令則必記之日錄傳之史筆萬世將謂陛下倦於聽納而忘先帝之美意事遂寢進中書舍人禮部侍郎祭京用事以寶文閣侍制出知湖州尋又奪職

居婺州復集賢殿脩撰卒年六十七

詳見宋史本傳

章緯字伯成浦城人案之子熙寧九年進士除提舉江東常平入對上面諭與換京差以便養遂改授開封府推官轉戶部員外郎擢淮東提刑會蔡京更鈔法江淮富商變為流丐赴水死者相繼緯上言變法誤民請如初政以存大信京怒降緯兩官竄台州復知通州秀州終戶部郎中

陳師錫字伯脩先占籍建陽熙寧九年擢進士第三調昭慶軍掌書記宰臨安縣入為監察御史言宋興號稱太平者莫如慶曆嘉祐之治願稽皇祖納諫御臣

之意以興治功時詔進士習法律又言方用經術以迪士類不宜以刑名亂之請追寢其制用事者謂倡為波說出知宿遷元祐間蘇軾舉以自代其辭云有名賢之德行追蹤古人有西漢之文章冠絕當世除秘書省校書郎加秘閣校理提點開封諸縣鎮事畿內將臣以苛刻失士心方大閱群卒鼓譟將吏莫知所為師錫馳至寘首惡者於法按閱如初而其將樞密院以不先白為罪罷知解州移知宣州蘓州徽宗即位召拜殿中侍御史疏白司馬光呂公着再安天下章惇誣其包藏禍心至於追貶今贈謚未還墓碑

未復願據宸畧以慰中外又言蔡京與弟卞同惡誤朝結內侍戚里以覬大用若果用之天下治亂自此而分俄遷考功員外郎師錫抗言臣在諫職數月所言皆當今急務不應遽解言職如蔡京典刑未正願受貶竄於是出知潁廬滑三州蔡京當國安置彬州宣和末復朝請大夫紹興初追贈左諫議大夫直龍圖閣章疏纔二萬言師錫晴有綠色將卒前一夕夢謁上帝帝問以平日奏藁對云因陳瓘之子正彙告蔡京謀叛京大興羅織之獄恐其及也已盡焚之帝顧左右取一大冊至云即卿奏疏也仍賜名仙籍矣

師錫次日沐浴端坐而逝當時有哭以詩者云霜臺奏疏無遺稿玉帝思忠特記名即謂此也自號間樂先生有文集十卷丞相葉衡為之序從祀鄉賢

黃仁榮字擇之孝先元孫年十三通群書以恩補承務郎授泰和主簿季陵帥臨安辟錄事叅軍李光代季待仁榮愈厚薦知金谿縣歷浙西提舉後知信州除江東運判改知衢州直稅閣建議請盡鬻州縣閑田及對高宗獎諭曰向論鬻田戶部得緡錢五百萬者卿也遂除度支郎中有沮之者改浙東提點刑獄復命知秀州執政以數更易為名上曰一州得人更之

何害凡除授監司郡守得人如黃仁榮足矣明年除
兩浙轉運副使數月加直敷文閣知臨安府俄丁母
憂服除壽皇付仁榮以提點諸路坑冶再除兩浙轉
運副使復知臨安府未幾移贛州卒年八十六

章粹字仲容元豐二年以上舍擢進士第初調上黨簿
秩滿遷防禦判守克定州學教授陟廬江縣令有巫
覲以禍福惑衆究其姦罪之衆惑亦解白湖之田沃
壤千頃頻年飄溺民不得畊廼為防以禦水民被其
利代還除魏王宮教授不及赴任改太府寺丞考簿
籍謬誤得羨財纒千餘萬通判恩州百廢具舉遼河

流湍溢郡人大恐粹增卑培薄迄以無虞陝西都運
鄭公瑾辟為勾當公事裨贊實多樞密鄭居中薦於
朝粹已寢疾大觀二年卒于京師

何述字明道元豐二年進士調奉符縣尉知當塗縣瀕
江歲有水患述築堤姑溪上民用安堵廣濟圩為田
千餘頃夏潦隄將決述別為長隄輔之卒全其半崇
寧初除開封府推官從尹以職事對上顧尹曰何述
詳雅必能助剴決遷開封府少尹歷除徽猷閣待制
知永興軍移帥涇原以恩信結諸酋豪邊陲無警奉
祠率所著有禮記解二十卷事類領要十卷廬江集

十卷

黃靜字安仁元豐五年進士別歷州縣所至有聲政和中除福建提舉值歲歉極力賑濟百丈山叢竹結實鄉人謂之竹米炊而食之大似占城米因圖而上之謂同穎之禾兩岐之麥雖其瑞自天其應在民未若深山叢竹結自然之實得以濟荒年也詔付史館且置常平倉於僊陽鎮以惠艱食之民而請于朝從之於是出錢數千緡爲糴資其倉自爲之記任滿丐祠以歸官至朝奉大夫

黃輔國字應圖轍之子元豐八年進士任青州司理調浮梁縣主簿以樞密章綵奏辟爲南海令改宣德郎知高郵縣淮右旱蝗極力賑濟活饒民數萬帥漕列薦授樞密院編脩官又以大臣薦除右正言累遷右司諫知無不言上方留意學校輔國建議令諸州縣皆置學以均試補之汰督學官不用本路人以絕請謁之私銷院謄錄以全武學之令考績黜陟以重學事之職立射廳於辟雍頒射法於天下皆著爲令除起居舍人命閱元祐以來臣僚章奏籍爲奸黨輔國不奉詔遂改中書舍人直學士院尋出知袁州江寧府落職知光州大觀初知福泉二州後以給事中召

而輔國已不起年四十七追贈大中大夫有文集五十卷

李充字仲實登元祐三年進士除真州司戶累官宣教
郎知台州臨海縣盜起青溪二浙州郡相繼失守台
守棄城遁太克與倅李景淵戮力守禦州城獲全詔
賜獎諭陟奉議郎知壽光縣引疾致仕山東盜起朝
廷方事北方遠近繹騷州縣疲於奔命克嘆曰張季
鷹發歸興於蓴鱸陶淵明耻折腰於五斗吾慕前人
固已晚矣遂以疾引去及虜騎長驅衣冠淪陷人始
服克之先見子穎士為大理丞

周因字與道固之子登紹興四年進士除閩縣主簿陟
勅命所刪定官通判鞏州時朝廷建明堂天章閣鳩
材於鞏童貫營第欲先得之因不可貫諷監司移為
洮州倅因以事聞朝廷直之亟命還通判憲州累遷
京西轉運副使奏罷歲調廣武雄武折納梢草價錢
諸本色以備河急宣和中春旱汴流壅塞朝廷欲決
澠口伊洛二水以益汴因奏洛民恃二水為生決之
不能益汴什分之一乃請於河陰決黃流入汴民亦
不失二水之利唐鄧汝蔡四州增新稅民間騷動奏
罷之屢遷荆湖南路轉運使上語及溪洞事對曰有

邊事邊臣之福無邊事朝廷之福時初得燕薊故語
及之徽宗為之改容建炎初除直徽猷閣知桂州安
南貢方物慮啓戎心奏乞受其貢厚禮遣還從人瓊
州民陳韜焚澄邁臨高二縣欲擅有海外四州憲司
議招降力爭不得後果再叛因討平之當中原失守
盜賊紛起因帥桂林五年嶺表帖然官至中大夫致
仕

周春年字春卿因子以蔭補將仕郎調象山縣主簿象
山瀕海多盜每歲偵伺賈舶殺人而取其貨春年籍
其名犯者皆寘于辟惡俗大變為撫州軍判官江西

和買例半常賦疏其害于部使者因檄差次裁損之
仍下其法於一路民至今德之改秩知僊遊縣歲饑
計口授粟不足請貸于郡又檄鄰邑通糶民賴以濟
邑故多盜繩之皆奔他境曰毋犯周大夫也聽訟必
使人各得盡其說伸紙揮筆剖決如神老吏却立驚
嘆至相率去通判道州紹興末令侍從各舉宜為郡
守之士禮部侍郎金安節條上春年嘉政未及用而
終年六十二

郭汝賢字舜卿元符三年進士居喪以孝聞服除調連
江尉再調南安知福清縣當官不私邑人信愛宣和

初通判興化軍權郡事郡分有國清塘瀦水周二十里溉田數千頃歲久不脩僞工增築民賴其利丁外艱服除知沙縣後知瓊州黎洞蠻叛殺掠居民汝賢遣兵據要地絕其往來前後掩獲數百降其酋蒙海內寧謐以功增秩主管台州崇道觀卒于家年八十二官至朝請大夫

楊授字夢錫郊子崇寧中擢進士第任銅鞮尉會攝邑事習俗極陋前此無應進士舉者建學擇民秀教之士始務學秩滿陞上津令東歸道經光化愛其地沃民淳買田築室因居焉無意進取日事唱酬優游自適卒年五十

章誼字宜叟登崇寧四年進士累遷杭州通判建炎初隨王淵平陳通之亂苗劉之變高宗御樓問群臣曰今日之事何如浙西宣撫司機宜時希孟輒曰乞問三軍誼越班斥之曰問三軍何義若將鼓亂邪希孟屏息帝嘉之事定遷三秩未幾為殿中侍御史邵青寇平江請置水軍於駐蹕之地又獻戰守四策有詔集議明堂配享誼言國家既以太祖配天於郊比周之后稷則太宗宜配地於明堂以比周之文王不聽紹興二年除大理卿遷徽猷閣直學士尋權吏部侍

卽樞密都承旨奏乞選五軍及諸州各為一衛合取
萬人分為兩衛以競王室加龍圖閣學士使金軍至
雲中面折金人不少屈還至南京劉豫留之以計歸
歷戶刑二部尚書以疾乞外知溫州移守平江帝臨
幸召對賜帶笏帝曰此不足以償卿勞其勿謝明言
復為戶部尚書奏上營田以省轉輸帝還臨安以誼
為端明殿學士江南東路安撫大使知建康府兼行
宮留守代還卒年六十一謚忠恪誼寬厚存大體奏
疏無慮數十百篇皆經國濟時之策士論歸之詳見宋史

本傳

周嗣武字功甫因孫用祖蔭補官調衢州江山簿任興
國軍司理改授臨川丞廉介自將能聲藉甚歲饑民
有嘯聚發巨室廩者聲言欲攻縣邑人惶懼父老勸
嗣武使避曰寇來吾當之爾等毋動給榜諭富室賑
之姦民屏迹陞臨川令歲復饑分饑民於寺觀官給
以粥仍籍富室使各贍其鄉里人被實惠郡守督賦
急嗣武每寬其罰一日守厲聲責之謂賦入於不登
而屑屑理訟豈曰能吏嗣武亦應聲荅曰朝廷設官
置吏所以為民若不辨曲直但峻催科非所謂能吏
也以外臺薦赴闕奏利民二事切中時病擢太府丞

提舉江西常平事除夔路運判改湖北提刑蠻僞為
亂以渠陽去賊巢甚邇亟奏令荆南合兵督捕戮蠻
首七人而撫其餘黨以功進直敷文閣遷度支郎執
政以嗣武使蜀稽考財計奏乞往成都潼川兩路科
買一年以寬民力又奏蠲興元茶息錢引二十萬又
言蜀旆天險舍劍門無他路近歲文州輒開青唐嶺
利州輒開馬道院率皆不由劍門別架棧道以引商
販宜悉撤之赴關入對上勞之曰往來萬里宣力甚
多除太府少卿湖廣總領召為戶部侍郎疾卒

周嗣恭字作肅因孫以世賞補官授南安尉陞南雄州

推官知邵陽縣累政積弊為之剗剗剔蠹未數月
無留訟部使者上其績幹辦諸司糧科院遷籍田令
奏對論民疾苦皆里閭根本九重未及知者上嘉納
之知荆門軍得泰州即為園池佚老之計日與親朋
往來其間以自遣疾革忽大雨震電家人問驚乎攝
衣危坐曰吾平生無欺心事何怖之有言訖而逝年
六十六官至朝請郎

劉汝舟字元造教子政和元年赴鄉舉試歸忽夢其祖
殿丞與父對語聞殿丞曰汝舟本在七人之列今乃
有堯羲之命驚覺詒於親舊或曰堯典首命羲和君

今首薦無疑既而果鄉舉第一次年登進士第任興
化軍司法郡有富民王氏死而無嗣聞于官驗實得
貲二十萬其妻以遺腹自訐太守欲籍其業汝舟執
不可後既生男又為辨折太守大怒汝舟納告命乞
歸怒雖稍霽尚籍其半王氏子名濟紹興中劉章榜
登第汝舟辟雍與張浚同硯席建炎初魏公持兵柄
獻平戎十策魏公一見歡甚奏辟隨軍參謀卒士論
惜之

黃緩字用和嘗從學於楊時時深器之登政和五年進
士為工曹按視諸邑水災蠲田租十之八部使者怒

面加誚責終不可奪再調衢州西安丞方臘初平知
縣淪廢緩織息畢舉聲譽籍甚靖康元年丞相李綱
宣撫河東辟為幕屬紹興六年召對稱旨除諸王宮
學教授以薦拜監察御史首陳七事一曰定聖心二
曰正朝廷三曰裕民力四曰振綱紀五曰革風俗六
曰嚴武備七曰圖遠効深蒙褒納上因問孟子與齊
梁國君問荅之說緩所對詞義敷暢上曰卿可謂非
堯舜之道不陳於王前者因諭臣下曰黃緩論人君
治心事甚詳當處以諫職會有沮之者議遂格出為
江西提點刑獄卒年五十六著唐史篤論二十卷

黃烈字元功宣和間累官知慶州方臘竊發諸邑陷沒
詔烈即劍川治事得方臘將洪載降之重修郡城民
賴以固

張大年登政和五年進士第補臨朐尉遷鍾離丞知萍
鄉縣時虜騎深入江浙羣盜蝟起萍鄉為江湖要會
日閱民伍教以兵法聲聞四境盜不敢入直徽猷閣
周因帥廣西聞之辟為經畧司幹官會營道蠻獠率
衆僭號所在深險官兵不能捕帥司盡以兵屬大年
議持久以困之分據要害賊衆果以饑潰海寇陳韶
等出沒為二廣患帥司復奏大年通判瓊州討之

聞其威畧率衆來降加秩二等倅道州後為紹州守
以疾卒于官

張次夔字和仲大年子以蔭補官福州理掾部使者攝
州事以私意撓獄持以不可使者不能奪帥相陳俊
卿大加器重薦之改秩宰衢之西安時邑有居言路
者親族往往以氣澹轢官府次夔不為屈人頗憚之
通判興國軍郡多私鑄大冶太守任幕官捕冶峻急
重擾平民次夔力言其不便已而群盜嘯聚湖島諸
司體訪得實太守幕官皆罷獨重次夔後奉祠里居
適歲小歉查源洞凶黨倡亂聲震遠近請於邑宰俾

遣弓兵掩捕宰不經意乃馳報府為備府檄次夔糾
集鄉民之材武者禦之斬獲數級賊退鄉人為建生
祠且立碑以紀其事

張次高字寬夫次夔弟以父蔭補官任東莞尉丁憂服
闋調長溪尉以獲賊功知建昌縣督造軍器前期辦
集進秩一等通直郎南雄州倅有論薦者欲內遷辭
以母老知南劍州轉朝奉郎陞辭論州縣科罰苦民
事孝宗曰聞州縣詞訴時有科罰且犯罪有條豈應
以是生財卿當為朕勤恤民隱簿書獄訟次之既到
官治績為諸郡最擢守徽州丁母憂既除喪乃知邕

州歷講馬政又乞減放廣東客丁米孝宗俞其請上
曰廣東去朝廷遠卿當以便宜從事應邊防撓密文
字可實封徑達次高謝曰願稟聖訓孝宗嘉之翼日
謂執政曰張次高亦好人材徼外蠻蜃接境交爭次
高視事三日即單騎渡江面慰撫之於是盡得良馬
留邊甚久夷俗甚安馬亦溢額朝廷方欲召用以疾
上章丐祠命未及下而卒官至朝奉大夫

黃衡字平國建炎二年試南省第一廷對進士乙科授
從事郎薦為吉州安福令夏六月太守呂源欲修城
壁衡以書諫止謂廬陵諸邑累困兵火加之亢旱豈

堪重役所宜速罷以慰民心太守得書劾之朝廷下
憲司體究守以罷去衡自是聲聞煒然薦除秘書省
正字遷校書郎累丐外得邵武軍倅抵家卒年四十

徐詡字元敏年十八預計偕登紹興二十一年進士調
會稽主簿再任上元縣丞徐公度一見重之遂加論
薦時韓仲通為守詡論議嘗忤其意竟亦薦之陞知
龍泉縣歲饑將發常平倉賑民丞有難色詡曰倘有
譴責吾任其咎於是籍三十人為甲人給以牌見牌
受米是歲饑而不害除提轄行在權貨務都茶場

課額增嘆召對授監察御史屬有旨命廷臣各且繫
冗虛偽等弊遂上六事一曰正朝綱以革機務之繁
冗二曰杜私謁以革政府之繁冗三曰限入流以革
吏員之繁冗四曰審聽納以革進言之虛偽五曰立
根本以革自治之虛偽六曰嚴守禦以革邊防之虛
偽上令侍從給舍臺諫集議且將施行之適容寇李
接竊發以提點廣西刑獄權漕事賊平改除成都路
轉運判官寬民節用財計沛然移知遂寧府適蠶麥
不熟盡發關防樽節鹽十餘萬引為民代租所至以
興學為先去西詔日捐公使錢買田一百六十畝助

成都學糧天彭郡文學劉大臨來告曰學徒滋衆而食不足遂蠲本州權酤失閏錢四百萬給之至遂寧一復葺學宮為錢一千六百餘緡知泉州至上饒改除江東轉運使被命一日而歿年六十六有東野居士集四十卷

郭忠順字移可篤志嗜學祖朝散嘗拊其頂曰此子當大吾門既冠以蔭得官主程鄉簿丁內艱服闋改連江南康縣丞張九成謂移可博問強記喜與之遊後知襄陽縣金虜寇邊荆鄂兩軍戍唐鄧餽運凡二十六萬斛諸司交章論薦陞奉化尹邑號難洽下車待士以禮撫民以寬束吏以法尤崇重學校士人愛之通判太平州未赴卒

郭德麟字邦瑞一字應之忠順之子初母夢日光射身已而生德麟擢進士第注候官尉調信陽尉為荆南錄叅因鞠強盜數十人帥欲盡寘於法德麟爭甚力帥深器之改宣教郎知明州奉化縣父子繼宰是邑士民為立二郭生祠除勅令所刪定官歷軍器司農太府三丞使虜歸奏虜事甚悉且言邊防不可不嚴上開納之除監察御史建言乞肅清宮闈嚴內侍入宮之制除宗正少卿入對上問福建旱荒如何德麟

奏常平已議賑恤不足煩聖慮控扼邊防諸帥實未
除授實係朝廷輕重願早加意不數月卒于官年六
十六有奏議二卷文彙五卷

詹體仁字元善父慥尉信豐金人渝盟往見張浚論滅
金稅計浚辟為屬體仁登隆興元年進士調浮梁尉
郡上體仁獲盜功狀當賞體仁曰以是受賞非願也
為泉州晉江丞宰相梁克家薦於朝累官太常少卿
陞對時上久不過重華宮體仁首陳父子至恩引易
睽孤之義以開廣聖意孝宗崩體仁率同列抗疏請
駕詣重華宮親臨祥祭辭意懇切時趙汝愚將定

策外庭無預謀者密令體仁及左司郎官徐誼達意
少保吳玘請憲聖太后垂簾為援立計寧宗登極與
有力焉時議孝宗謚體仁抗議宜謚曰孝卒用其言
又言永阜陵地勢卑下非所以妥神靈與宰相異議
除太府卿尋直龍圖閣知福州言者竟以前論山陵
事罷之退居雪川日以經史自娛起為直龍圖閣知
靜江府奏閣十縣積欠稅錢一萬四千蠲雜賦八千
移守鄂州除司農卿督湖廣餉事歲凶以便宜發廩
賑救而後以聞韓侂胄議開邊體仁移書廟堂言兵
不可輕動宜遵養俟時嘗語真德秀以居官蒞民之

法曰盡心平心而已盡心則無愧平心則無偏世服其確論卒年六十四詳見宋史本傳從祀鄉賢

徐應龍字允叔登淳熙二年進士累調湖南憲司檢法官潭州獲劫盜指逸者為首逸者獲吏執成款使誣服獄上應龍固持不下提刑慮彥德不欲反其事應龍力與之辯彥德不能奪改知高安縣呂祖儉以言事忤韓侂胄謫死高安應龍為之經紀其喪為文誄之或勸避禍應龍曰呂吾所敬緣此譴死榮矣朱熹遺之書曰高安之政義風凜然遷知南恩州秩滿司舍生陳自強當國諭欲留中應龍不荅丐雷州而去

部使者交章上最召監行在都進奏院累遷國子祭酒兼崇政殿說書天早上言請烹桑弘羊乃兩除稅書監累遷刑部尚書兼侍讀屢指陳時政為特相所忌改兼太子詹事力乞奉祠速歸奏乞立皇子曰高宗謂太祖艱難得天下而子孫不得居天位遂以孝宗繼大統三傳至陛下皆太祖子孫今陛下當於太祖位擇人徙吏部尚書以煥章閣學士提舉嵩山崇福宮卒贈開府儀同三司謚文肅累贈太師魏國公子榮叟清叟詳見宋史本傳從祀鄉賢

徐清叟字直翁登進士調太平教授虜犯宣化制司令

州禁采石渡清叟曰虜今未至柰何先自推赤子魚腹中守從之淮民得渡者三萬餘紹定初遷籍田令應詔抗章乞為濟王置後遷太常博士復請厚人倫以釋群惑惜名器以示正義因人望而進人才蓋欲復濟王爵邑抑史彌遠恤典召用真德秀魏了翁也端平二年除殿中侍御史疏論三漸尤痛激改太常少卿兼戶部侍郎改工部除廣西經畧福建安撫福州饑貸南劍常平米七千石旁招廣浙米詣諸剝賑饑民全活不可勝計累遷端明殿學士簽書樞密院事叅知政事余玠專制全蜀上欲召未決清叟奏云

陛下何不出不意徑召之上不荅復留身奏云陛下豈以玠握重兵召之或不至邪玠素失士心必不敢上遂召玠詔遣余晦代之制下清叟奏曰朝廷命令不甚行於西蜀者十有二年矣今者天斃余玠乃祖宗在天之靈社稷無疆之福陛下大有為之機也今乃以素無行檢不堪重任余晦當之臣恐五十四州軍民不特望而輕鄙之夷狄聞之亦且竊笑中國之無人矣乞賜收回成命帝不聽清叟乞罷政不許竟不狎晦誥勅實祐三年令民自實田畝清叟爭曰此秦法不可用福建二廣湖北尤當少寬既而江浙民

多不便上嘆曰自實果擾民遂不行平生孤忠無所
附麗人目為殿上虎自號章一封晉寧郡公卒謚忠
簡從祀鄉賢

徐榮叟字茂翁應龍子嘉定七年與弟清叟同第進士
歷永康令以賑饑得民心召為太學博士兼崇政殿
說書嘉熙四年由左司諫拜右諫議大夫入對言自
楮幣不通物價倍長而民始怨自米運多阻粒食孔
艱而民益怨外而郡邑苛征橫斂嚴刑峻法無所不
有又言朝廷當以節義厲士夫則緩急必無求生害
仁之事權禮部尚書兼吏部拜端明殿學士簽書樞

密院事淳祐二年參知政事李韶與宰相議不合求
去榮叟發忿爭曰韶議論無阿朝廷如此士夫絕少
安可去相銜之力求俱去除資政殿學士提舉洞霄
宮致仕上春禮不替御書橘坡二大字賜之卒贈金
紫光祿大夫謚文靖所著有緝熙講議諫垣存藁西
掖代言南宮表牋橘坡雜著

詳見宋史本傳從祀鄉賢

元

鄭收字德華歷翰林國史院檢討至正中為福建行中
書省左丞收醞藉儒雅巡歷所至興學勸士輿論歸
之

國朝

徐奇字以正漆祿子領洪武己卯鄉薦選授戶科都給事中封駁章奏物論重之永樂二年特陞江西布政以任大辭又

命為福建布政以本貫辭於是改授廣東右布政使政尚寬簡旬宣所歷庭無留訟未幾以憂去哀悴而卒

潘賜字文錫號容菴才思高邁操履端方登永樂二年進士授行人出使日本深得其體外國卑辭納款謝約束不謹回獻德化書大典頌

太宗皇帝覽之稱善命入史館擢鴻臚少卿再使日本克

稱厥職陞江西右叅政讎家摘其詩句以為妖言坐落職洪熙元年起為南京刑部主事宣德癸丑除鴻臚左少卿

賜織金麒麟羅衣一襲寶鈔二百錠自賦詩云品制未還金孔雀榮光先著玉麒麟仍使日本全節而歸

宣宗深加獎勞未幾卒于官所著有竹梅篇皇華勝覽容菴文集若干卷從祀鄉賢

陳遜字必恭號古朴子擢永樂十年進士任監察御史廉介有為特立敢言秩滿陞雲南布政司叅政尋陞右布政使有學有守卒于官囊無遺貨都督沐昂為

棺殮歸其喪嘗自贊畫像曰山澤之癯鐵石之軀澄
清栢府宣化藩隅位斯要矣行敢乖殊於貨利而不
競於權要而不趨人皆鼓瑟我獨吹竽不是求竒捏
恠仰惟前哲之謨天地氣性父母肌膚至尊至貴可
不慎夫臨深履薄戰兢自圖雖不到聖賢地步其於
擴天理遏人欲而有所忌憚者或庶幾乎從祀鄉賢
張善字性之莊靜警敏登永樂辛丑進士拜監察御史
以廉介自持出按廣東馬軍林思祐倚權肆剽掠害
民滋甚善捕其黨三十餘人寘諸法尸思祐于市民
賴以安正統間以疾

財告致仕

張鵬字搏南贛州貳守瓛公少子稍長遂志聖賢之學
嘗云西山先生後學指南幸同闕里敢忘景行哉與
兄鳳同領弘治甲子鄉薦正德辛未成進士授戶部
主政督馬廠劾中璫私貸影射之弊中璫側目擠陷
得楊公一清石公瑤直之始得免監兌湖廣特請敕
而行又奏請重臣沿河督漕運至今永賴督餉遼陽
武廟東巡公獨具疏詣行在諫止之轉本部正郎三
上章乞歸養始獲免以羨錢萬緡貯庫而歸嘉靖初
起用以不先謁執政張公孚敬銜之補兵部郎尋陞

山東按察司副使飭臨清兵備時監司欲以賄脫二重獄堅執不從即呈敕劄抵家年荒每月聚衆給米存活者衆龍泉山寇迫城署縣簿惶怖幾縊鵬力議固守城卒得全觀風使者歷薦皆以疾辭年八十卒公於書無所不博尤精理學隆慶元年史館移文覈其病故年月纂入實錄崇祀鄉賢

張明字元亮壬辰進士授戶部主事委齎金帛陝右宣大悉以溢銀數百貯邊藏內翰程公文德坐楊實卿事左遷衆憚執政莫敢贈言明獨秉筆邀同輩餞于郊會傳執政令邏卒捕其黨皆引去明毅然獨留程

嘆曰此見交情矣大中丞王公廷相以明方正疏改四川道御史

命下本部沮留亦無愠色先本部委勘蔡都尉奉請民地直減地租千兩又欲增商額以不奉命忤意故沮之督兌蘇松等郡獨持清操居戶曹七載當推憲副值聖母梓宮附郢陵武昌首郡尤劇乃推補至則節藩需例三千佐陵費吏民有張青天之謠漢江私渡為害既捕獲仍設法杜之

大駕臨楚執事者倉皇解綬明急籌卒辦

賜白金文綺擢江西叅政以勤勞羸疾卒藩臬暨憲司

助襯以歸公居鄉時學宮痺隘移天心寺廓其址浦
登第者例有牌坊價銀三百兩謝不受里甲例撥人
夫供役亦辭曰何敢以一第為鄉里累也有議建驛
於浦者力陳于當道議乃格閩浙交界舊設峽口一
關與僊霞關相去僅數里許行旅苦征疏罷其一其
有德于鄉類如此隆慶元年纂脩實錄已經采入所
著有梅江遺稿萬曆二十三年崇祀鄉賢

徐萬仞字抑之萬曆癸未進士授金華府推官廉平不
苛隣郡咸賴就理署蘭谿篆不數月弊政悉除勸民
起溺女配減獲去狼鬪至今誼為徐青天云至解篆

去麥穗生兩岐相國趙公宗伯陸公為圖贊之以為
循政之報將內召忌者阻之遷荊州撫夷同知荆有
門攤之役一切行賈居送取給民間貧富胥困公為
設九等法令民季出金吏自辦之民大悅其他如給
貴人之糧使無黃綠白李豕數十年之寃而脫之縲
綆皆人不敢為而亦不能為者及召入戶曹即諸貴
人與民遮道泣送數百里嘗司穽崇文明羨金千餘
公奏入之歲侵捐俸作糜民藉以活歷曹即既久當
起補會睢陽彫弊司寇呂公請以公為守公至罷門
稅農民例金千數時方急邊徵歛諸郡邑公以民贖

金佐之又築河防三十餘處全者數萬家竟瘁卒于官無以為歛當道憐而賻之始得以襯歸生祠二一澗澗水驛一荊州府去思碑三一金華城一都門一睢陽所遺有聖諭解勸民書方言集迴石稿十二卷萬曆三十年崇祀鄉賢

忠烈

夫士平居誦說詩書信眉抵掌而稱仗節者何限一旦事起而抱首鼠相接也非其初念謬也則死生之際深矣攷覽浦邑舊志得忠烈之士三人彼其以孤軍而捍勁敵誓剪滅此而後朝食忠憤所激不難以身殉之壯

哉死也千載凜然猶生矣余欲博訪而續之卒寥寥希覩焉豈從容就義之難乎抑鴻毛泰山所處之勢異也

宋

潘中字民極妙齡俊敏博通經史崇寧間擢進士第三知長溪縣建炎丙午二帝北狩拜詔之初涕泣交頤士民聽詔者數千人皆為感慟次日成詩五章以泄忠憤首章有二帝蒙塵事北征小臣疾首淚如傾之句其年建卒葉濃叛長溪與建安接境中慮衝突乃命鄉人結忠義社預為之備次年賊勢益張寧德縣令遣書告急中星夜赴之冒險與戰為賊所執賊脅

中使從中叱之曰汝輩健兒平時養父母畜妻子春
秋衣廩郊祀賞給國家何負汝輒敢背叛我恨不斬
汝萬段肯與汝俱生耶遂遇害憲帥以聞于朝詔贈
朝請大夫官其二子從祀鄉賢

黃璘字邦美幼孤嗜學政和八年登第除分水丞改密
州教官再丞拱州襄邑靖康元年金人犯京闕分兵
襲拱州城陷太守死於難虜據州治驅迫郡縣吏使
爲鄉道一郡風靡獨璘移病不出賊促行急赴井而
死時年四十璘之死也吏得故棺以殮藁葬城外數
月其弟奎自吳中發棺視之有大書于蓋曰異日諸

弟來煩舉葬於先塋之側驗之乃璘筆蹟遂負骨以
歸建炎初搜訪死節之士或言璘姓名并事實詔贈
朝奉郎官其一子璘無子以弟爲嗣從祀鄉賢

徐夢發與兄華老同登嘉熙二年進士累官至朝議大
夫廣東招捕使居官二十八年平恕仁慈未嘗一息
忘忠孝凡討捕所至靡不望風來附丙子歲元兵下
江南夢發守僊霞關龍兵猝至左右皆潰夢發獨踞
坐大詬遂遇害後郡聞之誅其加害者數人舉其二
義授以平安軍同知從祀鄉賢



